

管

子

義

證

管子義證卷五

臨海洪頤煊

卷十三

心術上第三十六

故必知不言

念孫案不言下脫之言二字下句不與萬物異理  
衍不字并見後解中尹注非

不休乎好

念孫案尹所見本本作不休乎好故云休止也不  
止人好利之情且云下解中作怵則此不作怵明  
矣今作怵者後人據下解改之也但改注內休止

也爲怵止也則於義不可通又案下解中作怵是也怵與誅通說文誅誘也漢書賈誼傳服賦怵迫之徒或趨西東孟康曰怵爲利所誘怵也迫迫貧賤也此云怵乎好迫乎惡卽承上文好利惡死而言故下解云人迫於惡則失其所好怵於好則忘其所惡尹注非

闕其門

星衍案闕當依上文作開

心術下第三十七

聖人因而財之而天下治實不傷

念孫案聖人因而財之而天下治爲句實不傷不

亂於天下而天下治爲句實與名正相對尹注非若存若亡

星衍案文選頭陀寺碑文注引存作有

金心在中

頤煊案內業篇作全心下文金心之形作心氣之形此作金字譌尹注非

害於戈兵

星衍案內業篇戈作戎

是故內聚以爲原泉之不竭表裏遂通

念孫案以爲原當依內業篇作以爲泉原表裏遂通通當爲達竭達爲韵涸固爲韵內業篇同

一言解之

念孫案當依內業篇作一言之解解地爲韵

白心第三十八

建當立有以靖爲宗

念孫案當當爲常有當爲首皆字之誤也建常立首爲句以靖爲宗爲句首卽道也道字古讀若首故與寶久爲韵下文非吾當當字亦當爲常

其事也不隨

念孫案隨當爲墮字本作墜方言云墜壞也呂氏春秋必已篇注曰墮廢也不廢不墮義正相承今作隨者因上文不隨而誤尹注非

正名自治之

念孫案之字因上句而衍

其人入入於身

念孫案人字亦因上句而衍

兵之勝從於適

頤煊案適古敵字言兵之勝則從於敵德之來則從於身敵與身對言之上文兵之出出於人其入入於身亦人與身對言二句文義相承尹注非故曰有中有中

念孫案有中有中當作中有有中上有字讀爲又

經傳通以

中又有中者中之中又有中也下句云

孰能得夫中之衷乎是其明證矣

夫或稽之

念孫案稽者稽之壞字

上聖之人

念孫案四字意屬下不屬上尹注非

祥其神矣

念孫案其當作於上文祥於鬼者義於人卽其證  
母提提

星衍案毛詩葛屨好人提提傳云提提安諦也淮南說林訓提提者射高誘注提提安也爾雅釋訓作媢媢言爲善者毋提提而安緩尹注非

不可以仕任

頤煊案依注當作任仕與下句合韻

卷十四

水地第三十九

具材也

星衍案水經河水注作其具材也而水最爲大

淖弱以清

星衍案文選運命論注引弱作溺

已獨赴下

星衍案海賦注引已作水

鄰以理者知也



頤煊案鄰讀如白石鄰鄰之鄰謂玉堅而有文理者禮記聘義作縝密以栗知也鄭注縝緻也荀子法行篇作縝栗而理縝鄰聲相近皆謂玉文事類賦注九引鄰作鄰尹注非  
瑕適皆見精也

星衍案事類賦注九引精作情荀子法行篇精亦作情聘義瑕不掩瑜瑜不掩瑕忠也忠字義亦與情相近尹注非

其音清搏徹遠

星衍案太平御覽八百三事類賦注引搏作專說文其聲舒揚專以遠聞專古數字

酸主脾鹹主肺辛主腎苦主肝甘主心

星衍案太平御覽三百六十引五主字皆作生

脾生隔肺生骨腎生腦肝生革心生肉

星衍案五行大義三引作脾生骨腎生筋肺生革  
心生肉肝生爪髮

肺發爲竅

星衍案五行大義太平御覽引俱作肺發爲口心  
發爲下竅五行大義并爲申釋其義是今本誤也  
欲大則藏於天下

星衍案太平御覽九百二十九事類賦注二十八  
引作欲大則函天地

管子義疏卷五  
五  
欲下則入於深泉

星衍案太平御覽事類賦注引作欲沈則伏泉

乘小馬

星衍案太平御覽七十二引作乘水鳥

涸川之精者生於螭

星衍案山海經北山經注引作涸水之精名曰螭  
法苑珠林八引作涸小水生蜺蜺者一頭而兩身  
可以取魚鼈

星衍案山海經注引作可使取魚鼈

愚疾而垢

星衍案意林引垢作妬

泔取而稽

星衍案意林引泔作汨

諂諛葆詐

星衍案困學紀聞十引諛下有而字

間易而好正

星衍案困學紀聞引間作簡

四時第四十

國家乃路

念孫案路與露同敗也見五輔篇尹注非

謹禱弊梗

顧煊案弊古通作幣字

凡宙碑彫弊作靡幣周禮女祝掌以

時招梗禱禳之事鄭注梗禦未至也此言將祭之時謹察其禱祀牲幣梗乃其祭名也尹注非

舍有罪

星衍案藝文類聚二太平御覽十引舍作赦

脩封疆

星衍案藝文類聚引作治封洫太平御覽事類賦

注三引作治封壇

無殺魔天

星衍案太平御覽事類賦注引天作卯

母蹇華絕芋

頤煊案藝文類聚二太平御覽十事類賦注三引

俱作無絕華萼蹇是衍字華絕二字誤乙芊卽萼  
字之譌尹注非

五政苟時

星衍案太平御覽事類賦注引作五政徇時下引  
秋三月亦作徇時徇與循同義徇時謂循其時序  
白帖二引作順時順徇亦音義相近

順旅聚收

頤煊案順讀爲慎旅謂旅處在野之農下文五政  
曰慎旅農趣聚收其證也尹注非

禁博塞

星衍案初學記三太平御覽二十四引塞作賽古

字通用事類賦注五引作簋白帖三十三引作禁  
博棊

周門間

星衍案周是固字之譌初學記太平御覽事類賦  
注俱引作謹門間謹與固義相近

德生正正生事

念孫案正與政同尹注非

五行第四十一

脩槩水上

念孫案上當爲土槩平也謂脩平水土也尹注非  
奢龍

念孫案奢當爲蒼北堂書鈔帝王部十一太平御覽皇王部四引此並作蒼龍

而天地治神明至

星衍案北堂書鈔四十九太平御覽七十九引作而天下治神明之至也

作五聲以政五鍾

星衍案北堂書鈔一百八引作下有立字政作正以下文作立五行以正天時句證之書鈔所引本是

水解而凍釋

念孫案水當作冰



草木區萌

念孫案區萌卽句芒樂記曰草木茂區萌連是也  
尹注非

農事爲敬

念孫案敬當作亟讀如亟其乘屋之亟亟急也言  
夏時不行誅罰唯農事爲急集韻亟或作蓋因譌  
而爲敬大戴禮文王官人篇亟再其說今本亟再  
譌爲敬再是其證也

然則天爲粵宛

頤煊案粵古越字左氏昭四年傳風不越而殺杜  
注云越散也淮南俶真訓精神已越于外主術訓

精神勞則越高誘皆訓越爲散宛古通作苑苑皆  
謂鬱結言天散其鬱結之氣草木得以養長五穀  
得以蕃實秀大也尹注非

衍組甲厲兵

星衍案北堂書鈔五十一引作合組甲厲士衆藝  
文類聚四十七太平御覽二百九又二百九十七  
引作全組甲厲士衆全卽合字之譌

地競環

頤煊案環讀爲營謂可營盡其地利尹注非

命左右使人內御

念孫案此下行一御字

羽卵者不段

頤煊案段讀作暇說文暇卵不孕也淮南原道訓獸胎不曠鳥卵不暇高誘注胎不成獸曰曠卵不成鳥曰暇段卽暇字之省

天子敬行急政

念孫案敬亦當作亟讀如亟稱於水之亟亟數也言天子數行急政則有旱札之災也

卷十五

勢第四十二

繆受其刑

頤煊案注云則被誅戮受其刑罪也繆當爲僂字

之譌

慕和其衆以脩天地之從

念孫案此與下文脩陰陽之從而道天地之常兩脩字亦當爲循循順也從行也言順天地之行順陰陽之行也道天地之常道與循義亦相近也

天地刑之

星衍案依下文刑當作形注云天地又見其意有從順之形字亦作形

動作不貳

念孫案貳當爲貳貳音他得反不貳不差也說文貳失常也字或作貳又作貸貳與下文極極德極

力代爲韵貳則非韻矣貳於貳字相近故貳作貳  
天地之形

念孫案當依上文作天地形之形與成爲韵尹注  
非

正第四十三

必脩其理

念孫案脩亦當爲循

九變第四十四

不然則州縣鄉黨與宗族足懷樂也

星衍案通典一百四十八太平御覽二百七十一  
引俱作州黨縣鄉二字是後人所加

不然則賞明而足勸也

頤煊案通典太平御覽引俱無不然二字墨子備城門篇不然則賞明可信而罰嚴足畏也亦無此二字方合九變之數

任法第四十五

善明法禁之令而已矣

星衍案藝文類聚五十四引作善明法察令而已之字衍

無間識博學辯說之士

念孫案間識當爲聞識下文聞識博學之人卽其證尹注非

聖君失度量

念孫案失當爲矢矢陳也矢度量置儀法相對爲文尹劉二說皆非是

頤煊案藝文類聚五十二太平御覽六百二十四引俱作設度量失卽設字之壞

令出而後反之

念孫案後當爲復復反與還廢相對爲文

用金玉事主而來焉

念孫案來當爲求尹注非

明法第四十六

百官識非惠也

頤煊案明法解作百官論職此各脫其偏傍而并爲一字尹注非

令求不出謂之滅

念孫案求當爲本下情求不上通謂之塞衍求字并見後解尹注非

不淫意於法之外

星衍案韓非子有度篇淫作遊尹注淫遊也義本此

比周以相爲匿是忘主死交以進其譽

念孫案當讀比周以相爲匿爲句匿與慝同比周以相爲慝猶言朋比爲姦也是下當有故字後明



法解作比周以相爲慝是故忘主死倭以進其譽  
是其明證也尹注非死交韓非子有度篇作外交  
外死字相近

非朝臣之衰也

星衍案韓非子有度篇臣作廷

故能匿而不可蔽

念孫案本無匿字義見後解據尹注亦無匿字

頤煊案韓非子有度篇作能者不可蔽亦無匿字

正世第四十七

治莫貴於得齊

引之案爾雅齊中也言莫貴於得中也尹注大謬

治國第四十八

民富則安鄉重家重家則敬上畏罪民貧則危鄉輕家輕家則敢陵上犯禁

星衍案藝文類聚五十二引作民富則安鄉安鄉則重家重家則敬上畏罪民貧則危鄉危鄉則輕家輕家則陵上犯禁

則敢陵上犯禁

星衍案羣書治要引陵作凌

而亂國常貧

星衍案羣書治要引常作必

法制不一

星衍案羣書治要引一作壹

必先禁末作文巧末作文巧禁

頤煊案兩文巧當依下文作奇巧

國富則安鄉重家

星衍案羣書治要引無重字下同

而民不惡也

星衍案羣書治要引惡作怨

人貧則輕家輕則易去易去則上合不能必行

星衍案羣書治要引民貧則輕家易去輕家易去  
則上合不能必行

管子義證卷五終

管子義證卷六

臨海洪頤煊

卷十六

內業第四十九

而可迎以音

念孫案音卽意字也言不可呼以聲而但可迎之以意也音與力德德得爲韵明是意之借字若讀爲聲音之音則失其韵矣下文惡音與聲脩心靜音音以先言音然後形音字亦讀爲意心術篇意以先言意然後形是其明證也不見其形不聞其聲而序其成

星衍案文選辨命論注引作視之不見其形聽之  
不聞其聲而序其成者道也

神明之極照乎知

頤煊案照當爲昭乎字衍昭知萬物爲句與上下  
文極忒合韵心術下篇作神莫知其極昭知天下  
通於四極其證也尹注非

精將至定

念孫案至當爲自上文精將自來卽其證也尹注  
非

能搏乎能一乎

念孫案古專字通作搏譌而作搏見幼官篇

能無卜筮而知吉凶乎

念孫案吉凶當依心術篇作凶吉吉與一爲韵

傷而形不臧

星衍案傷上當有脫字

理丞而屯泄

引之案尹以屯爲屯歟非也丞讀爲丞丞升也泄

發也屯當爲毛字之誤也

史記魯世家子屯立是爲康公漢書律歷志屯

作毛漢書溝洫志河決於館陶分爲屯氏河師言古曰隋室分析州縣誤以爲毛氏河乃置毛州言

得道之人和氣四達丞泄於毛理之間故句中無

敗也淮南泰族篇今夫道靜莫恬淡四枝節族毛

蒸理泄是其證也淮南言毛蒸理泄此言理丞毛

泄互文耳

封禪第五十

顧煊案封禪篇唐初尙未亡史記封禪書索隱云  
今管子封禪篇是也尙書序正義禮記王制正義  
文選羽獵賦注引此篇古者封泰山禪梁父以下  
皆作管子是孔冲遠司馬貞李善輩猶見之

炎帝封泰山

星衍案禮記王制正義引炎帝作少皞

小問第五十一

公曰吾聞之也

念孫案當作夷吾聞之也此管仲語非桓公語

百川道

念孫案道猶順也楚語曰違而道從而逆是其證  
百川道年穀孰糴貸賤三句相對爲文尹注非  
發食廩

星衍案食是倉字之譌

其臣教

引之案敎當爲敘反色介敘與豐正相對玩注意亦  
是殺字也殺字或書作敘形與敎相近

公遵遁繆然遠二三子遂徐行而進

念孫案公遵遁繆然遠爲句二三子遂徐行而進  
爲句遵遁與遂巡同尹注大謬



先傳曲木先傳直木

星衍案意林兩傳字俱作搏

與若之多虛而少實

引之案若當爲君下文云又與君之若賢是其證也尹注大謬

瞑目而視視鳧已疵

念孫案瞑目當爲瞋目隸書真字或作冥冥字或作寔二形相似而誤莊子秋水篇瞋目而不見邱山瞋本或作瞑韓子守道篇瞋目切齒傾耳淮南道應篇欬非瞋目教然今本瞋字並譌作瞑是其證也

桓公放春三月觀於野

頤煊案放古字通作方尚書堯典方命圯族漢書  
傳喜傳王商傳俱作放命圯族荀子子道篇不放  
舟楊倞注放讀爲方尹注非

桓公北伐孤竹

星衍案水經濡水注按管子齊桓公二十年征孤  
竹

走馬前疾

星衍案太平御覽三百二十九引作馬前疾走  
若右涉其大濟

念孫案劉逵吳都賦注水經濡水注藝文類聚戰

伐部引此並作已涉大濟當據改太平御覽神鬼部二引此作已涉其大濟則所見本已誤衍其字

唯已涉二字不誤

說苑辨物篇作已渡事果濟

未有室家而安召我居甯子其欲室乎

星衍案藝文類聚三十五太平御覽五百引作未有家室我將安歸甯子其欲室乎仲以其言告桓公

有執席食以視上者

念孫案視上當爲上視尹注云私目上視卽其證也北堂書鈔武功部二引此正作上視呂氏春秋重言篇說苑權謀篇亦作上視

東郭郵至

星衍案金樓子志怪篇作却隸釋孫根碑郵本作却說苑權謀篇作垂卽郵字之省北堂書鈔一百十四引作牙與呂氏春秋重言篇同與之分級而上

念孫案上當爲立此因與上句相涉而誤呂氏春秋說苑及論衡知實篇並作分級而立

小人善意

念孫案意讀爲億億卽度也尹注非

口開而不闔是言莒也

頤煊案顏氏家訓音辭篇云北人之音多以舉莒

爲矩東郭牙望見桓公口開而不閉故知所言者  
莒也然則莒矩必不同呼此伐莒以音而知非論  
字形尹注非

唯莒於是

念孫案尹注未曉於是二字之義於是二字與焉  
字同訓言臣觀小國諸侯之不服者唯莒焉故曰  
伐莒也莊八年公羊傳吾將以甲午之日然後祠  
兵於是於是卽焉也僖十五年左傳晉於是乎作  
爰田晉於是乎作州兵晉語作焉作轅田焉作州  
兵西周策君何患焉史記周本作君何患於是此  
其明證矣

卷十七

七臣七主第五十二

不辭則國失勢

星衍案辭卽悟字與寤通用謂不覺寤也下俱同  
尹注非

昏則緩急俱植

頤煊案植古置字

尙書金縢植壁秉珪鄭注植古置字論語植其杖而芸熹平石

經作置其杖

謂緩急皆置而不行尹注非

國家踣

念孫案度路爲韵時苗爲韵今本路作踣乃後人  
不知古義而妄改之耳下文亡國路家今本路作

踣亦是後人所改

故民有義不足

念孫案義當爲美字之誤也後國蓄篇輕重已篇  
多言美不足尹注非

倮大衍

頤煊案倮當作倮輕重已篇作毋戮大衍古通作  
勗謂盡其力也尹注非

傷伐五穀

念孫案五穀當爲五藏禁藏篇云冬收五藏是也  
今作五穀者因與注文相涉而誤注言五穀之藏  
是解五藏非解五穀也續漢書五行志注引此正

作傷伐五藏

則百長不生

星衍案續漢書五行志注作春政不禁則五穀不成夏政不禁則草木不榮

大風漂屋折樹

星衍案漂當依續漢志注作飄樹下有木字

山多蟲蠹

念孫案蟲蠹卽蟲螟月令曰蟲螟爲害是也注內蠹卽蚤三字蓋妄人所加非尹注也

亡國之庶也

星衍案續漢志注引庶作簾



羽劍珠飾者

星衍案續漢志注引羽劍作翠羽

文采纂組者燔功之室也

星衍案續漢志注引作五采纂組者蕃功之室也  
則人主道備矣

星衍案續漢志注引作則王道備也

禁藏第五十三

夫冬日之不濫非愛冰也

星衍案意林太平御覽二十二又三百九十五引  
濫作盥冰作水

夫先易者後難

星衍案依注者當作而

夜以續日

星衍案意林引續作繼

海深萬仞

星衍案意林太平御覽八百三十三引作百仞

就彼逆流

星衍案意林引作衝波逆流

菹笠

頤煊案菹當作菹注云取菹澤草以爲笠字亦作菹

則功戰巧矣

頤煊案功古通作攻字

菽室煊造

念孫案尹說甚謬輕重已篇教民樵室鑽鑿堽竈  
泄井所以壽民也鑽鑿泄井卽此所謂鑽鑿易火  
杆井易水也樵與菽古字通菽室卽樵室也公羊  
春秋桓七年焚咸邱傳曰焚之爲何樵之也樵之  
者何以火攻也樵室與煊竈意相近皆謂以火乾  
之也堽與煊字相似故煊譌作堽造卽竈字也  
母拊竿

引之案拊當爲折竿當爲芽言母折萌芽也俗書  
折字或作折因譌而爲拊鹽鐵論論勇篇推鋒折

銳今本折譌爲拊是其證矣又隸書从艸竹之字  
往往譌溷故芽譌爲芋又譌爲竿也

夫法之制民也

星衍案後漢書黨錮傳序注引民作人無也字  
果蓏素食當十石

頤煊案素古通作索字索盡也謂果蓏盡食當十  
石輕重乙篇素賞軍士亦謂盡賞軍士尹注非  
如典之同生

星衍案典當作與尹注非

### 卷十八

入國第五十四

入國四旬五行九惠之教

頤煊案四旬四十日也五行行五次也史記管仲列傳正義引管子云相齊以九惠之教是約其義也尹注非

一曰老老

星衍案北堂書鈔三十九引作一曰養老

八曰振困

星衍案史記正義引作八曰賑北堂書鈔引作賑困

身之勝勝

念孫案勝讀如減省之省勝亦瘦也字或作肯又

作省周官大司馬馮弱犯寡則眚之鄭注眚猶人  
青疫也釋名釋天篇曰青瘡也如病者省瘡也並  
字異而義同

殊身而後止

念孫案說文殊死也猶言歿身而後止也尹注非  
庸人訾厲

頤煊案列子黃帝篇物無疵厲莊子逍遙遊篇使  
物不疵厲爾雅釋詁皆病也古字皆通用

九守第五十五

四曰上下前後左右熒惑其處安在

念孫案尹以熒惑爲法星非也熒惑猶眩惑也周

書史記篇曰熒惑不治鬼谷子符言篇四曰作四方其處作之處於義爲長四方上下承天地而言左右前後承人而言熒惑謂不明於天地人之道君因其所以來

念孫案來當爲求鬼谷子符言篇正作求尹注非脩名而督實

念孫案脩當爲循循因也因名而責實也淮南主術篇曰循名責實官使自引後漢書王堂傳曰循名責實察言觀效蜀志諸葛亮傳評循名責實虛僞不齒皆本於管子

星衍案文選晉紀總論注引作循名而案實

桓公問第五十六

黃帝立明臺之議

星衍案初學記十三藝文類聚十一引明臺作明堂

上觀於賢也

星衍案三國志魏文帝紀注引賢作兵

禹立諫鼓於朝而備訊唉

星衍案北堂書鈔九引作禹置敢諫之鼓太平御覽六十七引作而備訊謠也三國志注初學記九引作備訴訟唉字譌

武王有靈臺之復



星衍案三國志注引復作囿藝文類聚太平御覽俱作靈臺之宮與上湯有總街之庭句相對初學記作靈臺之候卽今本復字之譌

度地第五十七

經水若澤

星衍案經水見下文若順也尹注非

水別於大水

星衍案水經河水注別作引言引他水入於大水及海今本作別非

雨輦什二

念孫案說文輦大車駕馬也輦非所以禦雨輦皆

當爲輦字之誤也輦謂車蓋弓也方言車枸簣西隴謂之楡郭璞曰卽車弓也楡與輦同釋名云輦藩也藩蔽雨水也故尹注曰車輦所以禦雨故曰雨輦

春不收枯骨朽脊

頤煊案周禮蜡氏掌除𩚑注故書𩚑作脊鄭司農云脊讀爲殯謂死骨也月令曰掩骼埋𩚑藝文類聚百太平御覽二十二又三十八引俱作朽𩚑古字通用

獨水蒙壤

念孫案獨當爲濁見下文

管子義證卷六終

管子義證卷七

臨海洪頤煊

卷十九

地員第五十八

其木宜樛欂桑

引之案尹以欂桑爲柔桑非也欂讀爲唐風隰有  
杻之杻爾雅曰杻櫨西山經曰英山其上杻櫨是  
也欂字古讀若杻故與杻通左傳公山不狃論語  
作弗欂是其證也

其泉黃而糗

星衍案後漢書馮衍傳注引作其水黃而有臭

其泉鹹

星衍案馮衍傳注引作其味鹹

如茅與走

頤煊案走非草名疑蓬字之譌

每州有常

星衍案困學紀聞四引州作土

蟲易全處

引之案易當爲豸豸與易篆文相似故豸譌作易  
爾雅曰有足謂之蟲無足謂之豸漢書五行志蟲  
豸之類謂之孽

其陰則生之楂藜其陽則安樹之五麻

念孫案安與則相對安亦則也言其陽則樹之五  
麻也今本安上有則字乃後人不曉文義而妄加  
之

青忞以涪及

引之案涪與灰爲韻及字蓋衍文耳下文云五隱  
之狀黑涪青忞以肥芬然若灰亦以涪灰爲韻

羣木安逐

念孫案安於是也爾雅曰逐疆也言羣木於是疆  
盛也下文羣藥安生羣藥安聚羣木安逐鳥獸安  
施義竝同也尹注非

條長數大

星衍案爾雅翼三引大作丈上文兩言數大疑亦  
丈字之譌

大萑細萑

引之案此篇凡言其種某某者皆指五穀而言若  
草木則於五穀之外別言之不得稱種也萑讀爲  
大雅維秬維秠之秠上文云其種大秬小秬此云  
其種大萑小萑是萑卽秠也萑字從艸負聲負古  
讀若倍聲與秠相近秠之通作萑猶丕之通作負

也

金滕是有丕子之責於  
天史記魯世家丕作負

累然如僕累

頤煊案山海經中山經墀渚是多僕累郭璞注云

僕𧈧蝸牛也此上下文若糠以肥如屑塵厲如糞如鼠肝皆舉物以喻其土尹注非

### 大糲杞小糲杞

念孫案糲當爲糲杞當爲杞糲卽黍稷重糲之糲

杞卽維糜維芑之芑

上文云大重細重大拒細拒大蕢細蕢重卽重糲之重蕢

卽維拒維拒之拒

大荒南經維宜芑芑糲楊是食郭璞曰

管子說地所宜云其種糲杞黑秀皆禾類也是其證尹注木名亦禾名之譌集韻杞禾名引管子其種糲杞義本尹注也

### 五殖之次曰五穀

念孫案五殖當爲殖土例見上下文



弟子職第五十九

如見賓客

星衍案文選絕交書注引見作有

顏色母作

星衍案文選注引作作作

左酒右醬

頤煊案醬當作漿曲禮酒漿處右鄭注云兩有之則左酒右漿義本此北堂書鈔一百四十四太平御覽八百六十一引醬作漿書鈔引注云漿右尚漱也不知何人所撰

周還而貳唯嚙之視

星衍案周禮酒正司農注賈公彥疏皆引此二句  
還作旋疏云周旋而貳者欲副益酒尊之時嫌謂  
不滿唯酒尊不滿者視之更益

執箕膺楪

頤煊案楪當依下文作葉禮記曲禮注引作搗儀  
禮士冠禮注古文葉爲搗毛詩小戎正義引作執  
箕膺搗傳寫之譌

右手秉燭左手正櫛

星衍案禮記檀弓注引右手折塋正義引作左手  
秉燭右手折塋釋文同塋燭頭燼也此左右誤乙  
又作櫛字誤

問所何趾

頤煊案說文引作問疋何止古文亦以爲足字或曰胥字此作所字與胥音相近

卷二十

形勢解第六十四

臣下隨而不忠

頤煊案隨讀爲怠墮之墮下文云解惰簡慢以之事主則不忠宋本隨作墮古字皆通用

銜合者

星衍案形勢篇令作命此涉上文而譌蜚搖而無所定

星衍案蜚古飛字後漢書明帝紀注引作飛字下  
俱同形勢篇作飛字

犧牲珪璧

星衍案形勢篇牲作牲

善馭馬者也

星衍案太平御覽七百四十六引作善御者也

度量馬力

星衍案太平御覽引作量其馬力

奚仲之爲車器也

星衍案藝文類聚七十一太平御覽七百七十三  
引無器字

非斲削也

星衍案藝文類聚引作非斤刀也

於四方無擇也

星衍案羣書治要引方作旁

道之純厚

星衍案羣書治要引道之作導民

偷得利而後有害偷得樂而後有憂

星衍案初學記十七引無兩有字

備利而偷得

念孫案備當爲循隸書循字作脩備字作脩二形相似而誤荀子勸學篇聖心備焉今本備誤作循

是其例也

蜚蜚飲焉

星衍案形勢篇作蜚猱爾雅釋獸猱蜚善援說文  
蜚善援字皆作蜚猱字當从犬旁作

故事不廣於理者

星衍案太平御覽八百二十引無不字

主視民如土

星衍案羣書治要引主上有人字

不以其理動者下瓦

星衍案宋本無動者二字因涉下文而譌太平御  
覽六百四十九引作不以其理下瓦

後必相咄

星衍案意林引咄作吐

卷二十一

立政九敗解第六十五

請謁任譽

星衍案譽當作舉立政篇本作舉任法篇亦兩言  
請謁任舉此譽字誤

版法解第六十六

則下饒

頤煊案饒當作撓屈也

無度則事無機

頤煊案藝文類聚五十四太平御覽六百三十八  
引機俱作儀任法篇故聖君置儀設法而固守之  
又云置儀設法以度量斷者上主也禁藏篇法者  
天下之儀也形勢解法度者天下之儀也此作機  
字誤

罪殺不赦

星衍案北堂書鈔四十三引作罪煞不疑

非斧鉞無以畏衆

星衍案羣書治要引畏作威下同

明法解第六十七

百官條通



頤煊案條讀曰脩漢書周勃傳乃封爲條侯地理志條作脩任法篇羣臣脩通輻湊以事其主卽其證

案其當宜

星衍案羣書治要引作案賞罰

故財貨不行於吏

星衍案羣書治要引財貨作貨財

雖貧賤卑辱

星衍案羣書治要引作卑辱貧賤

則民務佼

星衍案明法篇佼作交古字通用

伎眾譽多

星衍案明法篇伎作交

邪之所務事者

念孫案邪上當有姦字

星衍案羣書治要引邪上有姦字

主無悟

星衍案羣書治要引悟作寤

小臣持祿養伎

星衍案明法篇引伎作交

故以戰功之事定勇怯

星衍案羣書治要引功作攻

任人而不官

星衍案羣書治要引官作課

萬民驩盡其力

星衍案羣書治要引驩作歡

臣乘馬第六十八

秣稷

星衍案集韻秣古藝字

策乘馬之數求盡也

念孫案此上當有管子曰三字

使農夫寒耕暑耘

星衍案藝文類聚五太平御覽二十四引暑俱作

熱

管子義證卷七終

[illegible]

管子義證卷八

臨海洪頤煊

卷二十二

事語第七十一

泰奢之數

星衍案上文作泰奢二字必有一誤

海王第七十二

問口千萬也

星衍案問當依宋本作開揆度篇俱作開口通典  
十引亦作開口

今夫給之鹽筴

頤煊案今當作令

行服連輶輦者

念孫案輦當爲輦

星衍案通典十引作輦

國蓄第七十三

故民無不累於上也

星衍案通典十二引累作繫

民予則喜

星衍案通典十二引民上有夫字喜作喜

故民愛可洽於上也

星衍案通典十二引作民憂此愛字誤

租籍者所以彊求也租稅者所慮而請也

頤煊案租籍當作正籍輕重乙篇租籍君之所宜得也正籍者君之所彊求也正讀如征此亦作租者涉下句而譌

不可爲籠以守民

星衍案通典十二引無爲籠二字民作人

人君鑄錢立幣

念孫案人當作今

人有若干百千之數矣

星衍案通典八引作人有若干百十之數矣

利有所并藏也



念孫案利有所并藏也本無藏字

藏字因上文穀有所藏而衍

見輕重甲篇尹注非

頤煊案漢書食貨志亦作利有所并也通典八引作利有所藏也無并字

藏經千萬

頤煊案通典十太平御覽八百二十三引經俱作鋸說文無鋸字漢書食貨志作經

鍾鑲糧食

頤煊案鍾鑲當作種饌漢書食貨志引此作種饌師古曰種五穀之種也山國軌篇尹注亦作種饌糧食

山國軌第七十四

民有過移長力

念孫案過當爲通地數篇輕重甲篇作通移國蓄  
篇作通施施與移同

捍寵纍箕勝羸屑糗

頤煊案此皆械器名寵疑作寵稂卽稂字之譌  
握以下者爲柴楂

星衍案楂卽槎字

山權數第七十五

使蕃衰者

頤煊案玉篇裕作衰衰卽衰字之譌

山至數第七十六

不曰貧之

星衍案揆度篇貧作用

秦之明山之曾青

星衍案揆度篇作秦明山之曾青上之字衍

內則大夫自還而不盡忠

念孫案還與環同謂自營也見君臣篇

秦秋田穀之存予者若干

頤煊案予當作子臣乘馬篇春秋子穀大登又曰幣之在子者以爲穀而廩之州里下文文義俱相同此作子字誤

卷二十三

地數第七十七

出銅之山四百六十七出鐵之山三千六百九

念孫案太平御覽地部一引此作出銅之山四百  
六十七出鐵之山三千六百九十中山經同當據  
改

頤煊案史記貨殖列傳正義太平御覽三十八引  
出銅之山上皆有凡天下名山五千三百七十一  
句今本脫之

此之所以分壤樹穀也

星衍案據中山經此字下脫天地二字

刀幣之所起也

星衍案中山經幣作鍛

上有陵石者

星衍案太平御覽三十八引作綠石八百十引作陵石與今本同

君謹封而祭之

星衍案北堂書鈔一百四十四引謹作遙

葛盧之山發而出水

星衍案史記五帝本紀索隱引作蚩尤受盧山之金而作五兵廬上無葛字高祖本紀集解引作交而出水藝文類聚六十引作廢而出水廢發古字

通用

以爲雍狐之戟芮戈

顧煊案荀子榮辱篇狐父之戟楊倞注狐父地名  
管子曰蚩尤爲雍狐之戟狐父之戈豈近此耶路  
史後紀四引作離狐之戟狐父之戈此作芮戈誤  
玉起於牛氏邊山

念孫案牛當作禺見國蓄揆度二篇

金起於汝漢之右洿

星衍案揆度篇輕重乙篇洿皆作衢

十人喏鹽

星衍案太平御覽八百六十五引喏俱作砥

煮沛水爲鹽

頤煊案沛當作沸沛水清不能爲鹽且下文修河濟之流字已作濟輕重甲篇乙篇丁篇并此篇此語凡五見唯輕重甲篇作沸字不誤

丈夫毋得治宮室

頤煊案丈夫當作大夫輕重甲篇孟春旣至農事且起大夫毋得繕冢墓理宮室其證也太平御覽八百六十五引亦作大夫

脩河濟之流

念孫案脩當爲循言循河濟而南也

星衍案太平御覽八百六十五引脩作循

揆度第七十八

皆以雙武之皮

頤煊案武當作虎此唐人避諱字通典十二路史  
後紀十一俱作虎

發朝鮮之文皮

星衍案發北狄國名

吾非埏埴搖鑪囊

頤煊案囊當作囊埤蒼囊作鞴鍛家用吹火令熾  
者也

其徐遠

星衍案徐當作涂見上地數篇



國准第七十九

彼菹菜之壤

念孫案菹菜當作菹萊菹或作沮孟子滕文公篇  
注云菹澤生草者也禮記王制注云沮謂萊沛周  
官縣師注云萊休不耕者是菹萊皆生草之地也  
輕重乙篇菹萊鹹鹵斥澤山間垆壘不爲用之壤  
萊字亦誤作菜唯輕重甲篇山林菹澤草萊萊字  
不誤

輕重甲第八十

端譟晨樂聞於三衢

星衍案太平御覽四百九十二引作晨譟於端門

樂聞於三衢此有脫誤御覽八十二又引作晨誤聞於衢

故遷封倉邑

星衍案宋本倉作食上下文俱作遷封食邑此倉字誤

金鉅之數

星衍案金是釜字之譌下文釜鉅無止其證也宋本作釜鉅之數

夫妻服簞

頤煊案服讀爲負輒人注記簞當依宋本作簞盛食之器言夫妻負簞而往者不以百里爲難今本

作簞誤

天酸然雨

頤煊案酸通作霰說文云霰小雨也義本此

解弋弓弩

引之案說文玉篇廣雅集韻皆無弋字弋當爲弋  
讀與韜同弓衣也

不得裴檄

頤煊案荀子性惡篇繁弱鉅黍古之良弓也然而  
不得排檄則不能自正裴排古今字

此何故也

念孫案此四字因上文而衍

一束十他

星衍案他是倍字之譌

天下倪而是耳

頤煊案倪通作睨是當作走言操之不工用之不  
善天下之人皆斜視而走耳今本作是字誤輕重  
乙篇同

請君伐菹薪

念孫案下文云山林菹澤草萊者薪蒸之所出也  
尹注非

煮沸火爲鹽

頤煊案沸水當作沸水見地數篇輕重乙篇

乃以令使耀之

星衍案太平御覽八百六十五引使作吏

請以給其口食箇曲之彊

頤煊案字書無箇字月令具曲植籩筐呂氏春秋  
籩作簾箇卽簾字之壞

遺財不可包止

頤煊案包當作拘拘畱也揆度篇作貨財不安於  
拘包拘因字形相近而譌

崑崙之虛不朝

星衍案太平御覽八百九引無之字爾雅有崑崙  
虛之瑯琅玕焉又云河出崑崙虛此不宜有之

字

卷二十四

輕重乙第八十一

玉出於禺氏之旁山

星衍案地數篇揆度篇皆作邊山曷旁因字形相近而譌

一箴

星衍案箴當依海王篇作鍼太平御覽八百三十引作針

故見予之所

星衍案據國蓄篇所是形字之譌

期於泰舟之野期軍士

星衍案羣書治要引作朝軍

誰能陷陳破衆者賜之百金

星衍案史記李牧列傳集解引作能破敵禽將者  
賞百金

言能得者壘千人

星衍案羣書治要引壘作累

見其若此其厚

星衍案羣書治要引作見禮如此

農事且作

星衍案太平御覽十七引且作旣

輕重丁第八十三

黃金珠玉五穀文采布帛

念孫案帛當爲帛輕重丁篇云五穀叔粟布帛文采是其證也通典食貨十二引此正作布帛其出之鍾也一鍾

頤煊案上鍾字當作中下文其出之中伯伍也其出之中鍾五金也其出之中伯二十也字皆作中此涉下鍾字而誤

帶山負海苦處

念孫案苦當爲谷上文山居谷處卽其證隸書谷字作𪛗苦字作𪛗形相似而誤



纂苳

頤煊案纂當作綦綦雜色苳草染成之故稱綦苳  
下文萊失綦苳字不誤

溝瀆阮而不遂谿谷報上之水不安於藏

引之案阮當爲阨報當爲鄣皆字之誤也立政篇  
曰溝瀆不遂於隘鄣水不安其藏又曰通溝瀆脩  
障防安水藏隘與阨同障與鄣同

五穀收粟

念孫案收當爲叔叔卽菽字見下文

泉金

念孫案泉當爲帛見上文

此謂乘天嗇而求民鄰財之道也

念孫案嗇亦當爲畱畱卽災字彗星天災也因彗星出而斂財物故曰此謂乘天災而求民鄰財之道

此何以洽

念孫案洽當爲給下文云國中大給卽其證也洽給草書相似故給譌作洽尹注非

表稱貸之家

念孫案表當爲旌故尹注云旌表也今作表者因注而誤

通之杭莊之間

念孫案杭當爲抗抗古讀若康小雅賓之初筵篇大侯既抗與張爲

韵後漢書班固傳典引尊無與抗莊卽康莊

投蠹虵巨雄

星衍案虵當依上文作虵

泮龍夏

頤煊案山至數篇龍夏以北至海莊禽獸牛羊之地也此泮字本海莊二字譌并作一字

輕重戊第八十四

虞戲作造六峯以迎陰陽

頤煊案峯當作金金古文法字

無茲睚之病

星衍案北堂書鈔一百四十二太平御覽七十九  
引茲脗作腸胃集韵胃古文作脗

循六卷

頤煊案恣當作金

二十四月

星衍案通典十二引作周月

代人果去其本

星衍案藝文類聚五十九太平御覽九百九引本  
俱作農

離枝聞之則侵其北

星衍案藝文類聚九十五引作離枝聞而伐之又

五十九引作齊聞而伐誤

輕重已第八十五

摠玉摠

念孫案摠當爲忽忽譌爲恩又譌爲摠耳忽卽笏字也皋陶謨在治忽鄭作習注云習者笏也士喪禮竹笏今文笏作忽

發出令

念孫案發下當有號字見下文

又樞權渠纁絲

念孫案又當爲乂乂與刈通齊語云槍刈耨耨是也樞當爲樞說文樞鉏柄名鹽鐵論論勇篇云鉏

榎棘檀以破衝隆是也權渠當爲獲渠下文云獲渠是也纒卽繩字之誤隸書電字或作𩇛又作𩇜形與晁相似𩇛之爲晁與𩇜之爲晁其下半亦相類也縲亦繩也

誅大臣

星衍案誅上當脫毋字

祀於太宗

星衍案太平御覽二十三引作祈天宗據下文祀於太祖此當作太宗

管子義證卷八 終